

ITANGIZWA RYA PARUWASI NSHYA YA KABAYA

Tariki, 2/10/2011 Nyiricyubahiro Musenyeri Alexis HABİYAMBERE, S.J, Umushumba wa Diyosezi ya Nyundo, yatangije ku mugaragaro Paruwasi nshya ya Kabaya aha n'Isakramentu ry'Ugukomezwa Abakristu bagera kuri 541.

Umwepiskopi ni we wayoboye Igitambo cya Misa. Yari akikijwe n'abapadiri 11 ba Diyosezi ya Nyundo, barimo abapadiri batatu bavuka muri Paruwasi ya Kabaya aribo: Padiri Evariste DUKUZIMANA, Padiri IRIVUZUMWAMI Denys na Padiri BAHATI Pascal.

Hari kandi Abihayimana bo mu Miryango itandukanye, Intumwa za Rubanda (Abadepite), Abayobozi ba Leta mu nzego zitandukanye, Umuyobozi wa Police Station ya Kabaya, Umuyobozi w'Ingabo mu Karere ka Nyabihu n'uw' Akarere ka Ngororero, abakristu benshi ba Paruwasi ya Kabaya, abakristu baturutse mu maparuwasi atandukanye yo muri Diyosezi ya Nyundo, Diyosezi ya Ruhengeri, Diyosezi ya Kigali n'ahandi.

Igitambo cya Misa

Mu Gitambo cya Misa habereyemo imihango ibiri: ***“uwo gutangiza ku mugaragaro Paruwasi nshya ya Kabaya no gutanga Isakramentu ry'Ugukomezwa.*** Umushumba wa Diyosezi ya Nyundo, yasomeye abakristu icyemezo cyo gutangiza Paruwasi nshya ya Kabaya. Ashingiye ku bubasha yahawe (CDC 515 na 518) no ku nshingano afite zo kwita ku bakristu ashinzwe ; yafashe icyemezo cyo gutangiza Paruwasi nshya ya Kabaya ifite icyicaro mu Murenge wa Kabaya, Akarere ka Ngororero. Iyo Paruwasi nshya igizwe ni inama eshatu za santarari ya Kabaya, inama enye za Santarali ya Muhanda, inama cumi na zirindwi za Santarari ya Gaseke, inama eshatu za Santarari ya Muringa n' inama eshatu za santarali ya Murambi. Ni ukuvuga ko Paruwasi ya Kabaya yafashe igice cya Paruwasi ya Rambura n'igice cya Paruwasi ya Muramba.

Paruwasi nshya ya Kabaya yaragijwe ***BIKIRA MARIYA***

UTASAMANYWE ICYAHA (Immaculée Conception), twizihiza buri mwaka ku itariki ya munani y'ukwezi k'Ukuboza. Yabwiye abakristu ati : ***« Bakristu ba Paruwasi nshya ya Kabaya, nimwisunge uwo muziranenge, Umutoni w'Imana, azabatoze kunogera Imana mu buzima bwanyu. Mufatane urunana mwubake Paruwasi yanyu, muyiteze imbere namwe mwiteza imbere, maze ubukristu butubyarire ubvandimwe nyabwo nk'uko intego ya Sinodi idasanzwe ya Diyosezi yacu ibidusaba. »***

Nyuma y'uwo muhango, Umwepiskopi yeretse abakristu Padiri Théophile NIYONSENGA, Padiri Mukuru wiyo Paruwasi nshya yavutse, amuha infunguzo za Kiliziya n'iza Taberenakuro, abereka na Padiri Innocent TUYISENGE, Padiri Vicaire, abasaba gukorana neza, gutanga urugero rwiza no gukenura intama baragijwe.

Chorale Mpuzamakorari yadufashije guhimbaza Igitambo cya Misa, mu ndirimbo nziza cyane zijyanye ni uwo munsu udasanzwe.

Inyigisho y'Umwepiskopi

Yabajije abari biteguye guhabwa Isakramentu ry'Ugukomezwa niba bemera ko Roho Mutagatifu bagiye guhabwa ari wa wundi wahawe abigishwa ba Yezu Kristu. Bose bavuze ko babyemera. Yarababwiye ati : « ***mugiye guhabwa Roho w'ubwenge n'uw'ubutwari*** ». Akomeza avuga ko uwahawe Roho Mutagatifu aba intumwa ya Yezu Kristu, yamamaza urupfu n'Izuka bya Yezu Kristu kuko aba abaye umwana w'urumuri, aba agomba rero guca ukubiri n'ibikorwa by'umwijima bityo ntagira isoni n'ipfunwe ryo kwerekana ko ari umukristu aho ari hose. Yatanze ingero nyinshi z'abantu bayobowe na Roho Mutagatifu, beze imbuto z'urukundo. Bagaragaje ubutwari n'ubutungane. Mu ngero yatanze harimo : Abahowe Imana b'i Bugande, Mama Anuarite, Félicité NIYITEGEKA n'abandi. Mbere yo gutanga umugisha usoza Igitambo cy'Ukaristiya, Umwepiskopi yahaye Paruwasi ya Kabaya Ostensoir, abashishikariza kuzajya bashengerera Yezu mu Ukaristiya.

Ibirori

Igitambo cya Misa gihumuje, twerekeje ahari hateguriwe ibirori, maze itorerwa rya Kabaya ryakira abashyitsi mu ndirimbo n'umudiho byiza. Nyuma hakurikiyeho kwerekana abashyitsi. Padiri Théophile NIYONSENGA na Bwana Patrick UWIHOREYE, Umunyamabanga Nshingwabikorwa w'Umurenge wa Kabaya, batweretse abashyitsi. Cyakora ikirere cyaradutengushye maze biba ngombwa ko gahunda zihutishwa.

Hakurikiyeho Ijambo ry'umukristu uharariye abakristu ba Paruwasi ya Kabaya atubwira amavu n'amavuko n'imiterere ya Paruwasi ya Kabaya.

KABAYA itangiye ifite abakristu ibihumbi 15.778, bibumbiye mu ma santarali atanu. Ifite kandi ibigo 10 by'amashuri abanza, ibigo 2 bifite icyiciro cy'amashuri abanza mu burezi bw'ibanze n'amashuri y'incuke 2. Mu bwitange bw'abakristu ba Paruwasi Kabaya, bubatse icumbi ry'abapadiri ryatwaye amafranga 10.783.800 Fr.

Ijambo ry'Umushumba wa Diyosezi ya Nyundo

Mu ijambo rye, yashimiye abakristu ubwitange bagaragaje mu gutegura itahwa rya Paruwasi ya Kabaya. Abashimira n'ubwitange berekanye mu kubaka icumbi ry'agateganyo ry'abapadiri.

Akomeza abararikira gukomeza guhuza imbaraga biyubakira Paruwasi yabo.

Umushumba wa Diyosezi ya Nyundo, yasabye abari aho kwita ku rubyiruko nk'imbaraga n'amizero y'Igihugu na Kiliziya. Yabasabye kwita ku mashuri ya Kiliziya Gatolika akorera muri Paruwasi ya Kabaya. Ningombwa kwita kuri bariya banyeshuri kuko byagaragaye ko bahura n'ibibazo byinshi birimo gutwara inda no kwiyahura mu biyobyabwenge. Yavuze ko nta burenganzira bafite bwo konona ubuzima bwabo kubera ko ababyeyi bababyaye, Igihugu na Kiliziya babakeneye. Nibirinde ababashuka bafite inyungu zabo zinyuranye.

Amagambo yavugiwe mu nzu yakiriwemo abashyitsi

Mu magambo yahavugiwe, ari Meya w'Akarere ka Nyabihu, Visi Meya w'Akarere ka Ngororero ndetse n' Intumwa ya Rubanda mu izina rya bagenzi be bari aho, bose bagiye bagaruka ku bufatanye buranga amadini na Leta ku buryo bw'umwihariko Kiliziya Gatolika mu nzego z'uburezi, ubuvuzi, imiyoborere myiza n' iterambere ry'abanyarwanda muri rusange. Bakomeje kugaragaza ukuntu amadini na Leta bahuza ingufu mu kubaka Igihugu.

Padiri Mukuru wa Paruwasi nshya ya Kabaya yashimiye abivanye ku mutima uburyo inzego za Leta zinyuranye zidahwema kumuba hafi. Yashimiye kandi abakristu ba Paruwasi ya Kabaya bakorera i Kigali, Ruhengeri, i Gisenyi n'ahandi. Abashimira igitekerezo bagize cyo gushinga imiryango-remezo ishamikiye kuri Paruwasi ya Kabaya.

Hakurikiyeho Ijambo ry'Umushumba wa Diyosezi ya Nyundo, yashimiye abakristu igikorwa cyiza bakoze cyo kubakira icumbi abapadiri ndetse n'ibindi bikorwa binyuranye badahwema kugaragaza, akomeza avuga ibyo Diyosezi ya Nyundo imaze kugeraho mu kwiteza imbere:

✓ **Harimo gusana Paruwasi zari zarasenywe mu 1994.**

Umwepiskopi yabwiye abari aho gahunda y'imyaka icumi Diyosezi ya Nyundo yihaye (2005-2015).

✓ **Muri izo gahunda harimo gutangiza Paruwasi nshya:**

- ❖ Paruwasi ya Gisovu (2007),
- ❖ Paruwasi ya Gatovu (2008),
- ❖ Paruwasi ya Muhato (2009).
- ❖ Paruwasi ya Kabaya (2011).

✓ **Harimo no gushakisha icyateza imbere Diyosezi:**

- ❖ Nko kuvugurura no kwagura Home St. Jean ku Kibuye;
- ❖ Kuvugurura no kwagura Centre d'Accueil St François Xavier Gisenyi.

Yakomeje abwira abari aho ko igihe kigeze kugira ngo abakristu bumve ko ubuzima bwa Kiliziya bubashinzwe, bakaba bagomba kuyiteza imbere, ariyo mpamvu hatangiye kubaho gucutsa za Paruwasi zimwe na zimwe bigaragara ko zifite ubushobozi. Umushumba wa Diyosezi ya Nyundo yabwiye abari aho ko igihe cyo gusabiriza kigomba kurangira kuko n'abafasha Kiliziya Gatolika bo hanze bagenda bagabanuka: bamwe barashaje abandi bataye ukwemera. **Tugomba rero kwishakamo ubushobozi bwo kwitunga, gutunga abapadiri no kubaka Paruwasi.**

Nyuma y'iri jambo rya Nyiricyubahiro, Umushumba wa Diyosezi ya Nyundo, Padiri Mukuru wa Paruwasi ya Kabaya yadusabiye Umwepiskopi Umugisha, nyuma dusezeranaho turataha.

Abantu bose bari bitabiriye uwo muni, batashye bishimye, kubera ukuntu wari uteguwe n'uruhare abakristu babigizemo kugira ngo uwo muni urangire neza. Bashimye kandi umubano uri hagati y'inzego zinyuranye za Leta, za Police ni iza Gisirikari zikorera muri ako Karere. Mboneyeho nanjye umwanya wo gushima abakristu ba Paruwasi ya Kabaya ubutwari n'ishyaka mugaragaza igihe cyose muteza imbere Paruwasi yanyu. Mbifurije umugisha n'amahoro, Bikira Mariya Utasamanywe icyaha abane namwe.